

→ DASAR & PENTADBIRAN

Program latihan industri rapat jurang kaum

[FOTO MOHD FADLI HAMZAH/BH]



Joseph (empat dari kiri); Ketua Pengarah Jabatan Perpaduan Negara dan Integrasi Nasional, Datuk Gandesan Lechthumanan (tiga dari kiri) dan Mazliham (enam dari kanan) bersama wakil tujuh IPT selepas menyaksikan MoU di Sepang, semalam.

→ Penerapan nilai murni perpaduan penting sebelum pelajar masuk alam kerja

Oleh Noor Atiqah Sulaiman
bhnews@bh.com.my

► Sepang

Program Latihan Industri Perpaduan dilihat sebagai salah satu langkah proaktif dan pendekatan terbaik untuk merapatkan jurang antara kaum yang semakin melebar di negara ini.

Menteri Di Jabatan Perdana Menteri, Datuk Seri Joseph Kurup, berkata nilai perpaduan dan persefahaman seperti bertolak ansur serta saling mengenali perlu diterapkan dalam diri pelajar sebelum mereka memasuki alam pekerjaan.

Pada pandangan peribadinya, kata Joseph, beliau dapat melihat anak muda di negara ini masih tidak faham mengenai silang perpaduan antara kaum dan masih mengamalkan kehidupan seharian secara berkelompok.

"Konsep program ini masih boleh dikembangkan kepada semua golongan masyarakat, tidak kira pada peringkat institusi pengajian tinggi (IPT) mahupun di pusat latihan teknik serta vokasional, asalkan ia dapat memberi faedah kepada generasi muda.

7 IPT jalin kerjasama

"Diharapkan, syarikat berkaitan kerajaan (GLC) yang majoritinya Bumiputera, dapat menerima pelatih industri daripada kalangan pelajar IPT swasta bukan Bumiputera," katanya selepas menyaksikan Majlis Menandatangani Memorandum Persefahaman (MoU) membabitkan tujuh IPT yang berminat menjalin kerjasama dalam program berkenaan.

Tujuh IPT berkenaan ialah Universiti Malaya (UM), Universiti Teknologi Mara (UiTM), Universiti Utara Malaysia (UUM), Universiti Putra Malaysia (UPM), Universiti Kebangsaan Malaysia (UKM), Universiti Islam Antarabangsa Malaysia (UIAM) dan Universiti Kuala Lumpur (UniKL).

Ditanya sama ada program berkenaan akan diperluaskan ke Sabah dan Sarawak, Joseph berkata, buat masa sekarang, ia hanya diadakan di Semenanjung Malaysia.

Sementara itu, Presiden UniKL, Prof Datuk Dr Mazliham Mohd Su'ud, percaya program berkenaan dapat membuka ruang dan mewujudkan lebih banyak peluang pekerjaan serta kerjaya kepada graduan.